

Nos ta Aruba:

Ta haci yamada pa no desmantela e refineria

ORANJESTAD - Mirando e hecho cu e situacion financiero economico di Aruba ta haya su mes den un situacion di un estado di emergencia, locual por cierto a wordo confirma pa di IMF, pa Gobierno di Reino mediante KB, CFT, y CAFT, pa e oficianan di calculacion internacional Fitch y Standard & Poor's, pa AHATA, ATIA, Camara di Comercio, y pa practicamente tur e socionan social cu a bandona e Dialogo Social fracasa y pa comercio practicamente den su totalidad y pa comunidad.

Mirando e hecho cu Aruba despues di e ceramento di e refineria – a keda cu unicamente 1 solo pilar economico, esta turismo, cu su so no por carga economia di Aruba y cu ademas den futuro lo enfrenta y confronta reto- y desafionan serio, manera e reapertura di Cuba pa turistanan Mericano. Mirando e hecho cu – no obstante cu e gobierno di Mike Eman, sin ningun transparencia, y den cooperacion no transparente cu Valero, a dicidi pa desmantela e refineria – Par-

lamento di Aruba a aproba un mocion pa pone un stop na e desmantelacion di e refineria te dia 31 di december 2015, di manera cu por evalua y investiga cualkier posibilidad real y realistico di un reapertura/continuacion di e refineria mediante cumpradonan/operadornan potencial.

Nelson English

Mirando e hecho cu un experto den asuntonan internacional di refineria, y anterior gerente di e refineria di Aruba, esta sr. Nelson English, den algun presentacion a demostra cu e refineria di Aruba, mirando e aspecto tecnico, economico y comercial, tin posibilidad- y derechonan di existencia, pero cu ta unicamente un decision corecto di gobierno di Aruba lo por realisa y duna un buelta positivo den e direccion di e negociacionnan entre Valero, cumpradonan/operadornan potencial y e propio gobierno. Mirando e hecho cu prome minister Mike Eman den articulo 2 di e protocol firma dia 2 di mei 2015 cu e gobierno di Reino, a indica cu ya e mes no por controla ni dirigi e situa-

cion financiero di Aruba, y cu tampoco e tin un plan di recuperacion economico duradero, realistico y diversifica, pero tampoco un alternativa economico riba termino corto pa e refineria;

Nos Ta Aruba ta haci un yamada na tur esunnan den e comunidad Arubano cu ta dispone di cualkier informacion tocante e tema, pa publica, y informa comunidad si nan sa di cualkier potencial comprado/operador pa e refineria, y pa pasa e informacion aki na gobierno, Parlamento, S.E. Gobernador, y na Prensa, y ta recomenda cu: Gobierno di Aruba – na un manera transparente – mediante Parlamento ta nombra un comision cu mester dirigi e negociacionnan entre Valero, gobierno y e potencial cumpradonan/operadornan. Punto di salida na e negociacionnan aki ta, cu e wafnan di e refineria ta propiedad di Pais Aruba, y cu – cu compra di e refineria e wafnan – ta wordo poni na huur cu e operador nobo. Gobierno di Aruba ta tuma e decision riba locual ta menciona aki ariba mas tarda dia 30 di juni 2015. □